

Lenghe furlane: i locutôrs atîfs a son 444.000

Al è il dât che al ven fûr dai prins risultâts di “Tire fûr la lenghe”, la ricercje IRES FVG - ARLeF fate in Friûl-VJ e tal Venet orientâl

La lenghe furlane le fevelin vuê in maniere ative **444.000 personis** (che a corrispuindin a **plui de metât de popolazion** residente intai Comuns dal Friûl-Vignesie Julie e dal Venet orientâl che si son declarâts di lenghe furlane). Chest numar al rive cuasi a 700.000 (ven a stâi 9 personis su 10) se si ten cont ancje di chei che dome le capissin. Lis areis dulà che l'ûs atîf dal furlan al regjistre lis percentuâls plui altis a son chês dal Friûl centrâl, de zone culinâr e de Cjargne. In pratiche, te plui part des areis cjapadis dentri de indagjin il furlan lu fevele almancul une persone su 2, e une su 4 e podarès recuperâ la sô competence de lenghe se e vignîs sburtade a doprâle. Sorpresis positivis a rivin ancje di citâts tant che Udin, Pordenon e Gurize.

Il vierzisi in gjenerâl **al plurilinguism**, che par plui dal 56% al è un grant vantaç e **il volê cognossi miôr** la lenghe furlane, che al tocje il **63%** dai intervistâts a son altris segnâi parimentri interessants, come ancje il so ûs tes gnovis formis di comunicazion digjitâl tant che codiç adat pe imediatece tes relazions.

I dâts a rapresentin i **risultâts principâi** de ricercje sociolinguistiche “Tire fûr la lenghe”, che e je part ad in plen dai intervents previodûts dal Plan gjenerâl di politiche linguistiche pe lenghe furlane 2021-2025. Il studi al nas par capî e par analizâ **l'ûs de lenghe furlane** e di chês altris lenghis che si fevelin in Friûl. Il lavôr, sostignût de Region F-VJ e metût in vore cul contribût de ARLeF, al è stât puartât indenant de IRES FVG e dal FEF (Forskningscentrum för Europeisk Flerspråkighet). Tra il mêis di Avrîl e chel di Jugn dal 2023, cu la compilazion di un cuistionari a son stadis cjapadis sù **plui di 4.300 intervistis** in 178 Comuns. Il campion de ricercje al garantis une grande rappresentativitât sedi di gjenar che di fassis di etât: i 74 istitûts comprensîfs che a àn partecipât, di fat, a àn contribuît cui lôr insegnants a puartâ il scandai tes fameis.

I ricercjadôrs cumò a son daûr a elaborâ une analisi complessive dal grant volum di dâts cjapâts sù, cul obietîf di **metiju a complete disposizion dal public dentri de fin dal an**. Dut câs, a vegnin za fûr riflessions interessantis: chê plui impuartante e pant che la lenghe furlane e je inmò presinte in maniere consistente te plui part dal teritori furlan e che e rapresente une part fundamentâl dal patrimoni linguistic e culturâl dal Friûl.

Un grant sens di identitât

Il sens di apartignince e la identitât furlane si afermin in maniere clare te plui part des areis cjapadis dentri de ricercje: il 52% dal campion al dîs di sintîsi “une vore” furlan, percentuâl che e rive al 75% se si ten cont ancje di cui che al declare di jessilu “avonde”.

La ricercje e mostre ancje che al esist un **teren ideologic favorevul**: di fat, la disposizion positive bande il furlan, calcolât tant che un codiç simbolic e identitari, e je cressude une

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

vore e in maniere trasversâl.

Di là dai teritoris extraurbans, li che il furlan al à simpri vût une difusion plui grande, al è interessant analizâ il dât dai **locutôrs atîfs** intes trê citâts principâls dal Friûl: Udin, Pordenon e Gurize. In particolâr, par Gurize e Pordenon la ricercje e presente une situazion tant plui positive di ce che si pensave: se a Udin il 40% dai intervistâts a fevelin la lenghe furlane, a Gurize a son il 23% e a Pordenon il 18%; tal stes ordin, invezeit, lu capissin l'82%, il 73% e il 55%.

I citadins a domandin plui invistiments pe lenghe furlane

Si à di evidenziâ ancje che i **citadins a son favorevui a doprâ i bêçs publics par ativitâts di supuart** al furlan. Ur è stât domandât di declarâ trops euros, di chei che a pain za di tassis, a podessin rapresentâ un valôr just par finanziâ misuris di sostegn: une percentuâl impuartante, il 77%, e je a favôr, cuntune medie di 22 euros parom, plui o mancun cuatri voltis ce che si invistis vuê par chês misuris intun an.

In famee il furlan al ten

Lis percentuâls nus disin che il furlan al è une lenghe ancjemò vive inte comunitât: e je prevalente fra chês feveladis dai gjenitôrs dal intervistât (51%); cu la mari e cul pari, invezeit, le doprin il 44% dai intervistâts.

Un altri dât impuartant al è che pal 79% di chei che a àn rispuindût al scandai, il fat di fevelâ plui lenghis in famee nol è un ostacul pal aprendiment scolastic, anzit, al rapresente un vantaç. La plui part dai intervistâts, **cuasi il 70%**, adun cul 59% di chei dal Venet orientâl, si augure **che il furlan al sedi plui presint intes scuelis**. Al è un risultât che al conferme lis percentuâls registradis ogni an intes scuelis dal Friûl quant che i gjenitôrs a sielzin l'insegnament de lenghe furlane pai lôr fîs.

Plui furlan intai media e te AP

Tal cjamp de comunicazion, si note che il furlan al ven doprât di plui tes platformis di messazistiche istantanee, dulà che par esempi une persone su 4 lu sielç pai messaçs vocâi; lis percentuâls a mostrin ancje che il furlan online al è plui scoltât che let o scrit. I intervistâts a calcolin il furlan tant che un **codiç adat pe imediatece comunicative**, confermant in maniere positive la sô presince intun setôr tant slargjât.

La analisi de sezion dedicate ae amministrazion publiche e evidenzie che intai uficis publics e intai rapuarts cu la amministrazion comunâl l'ûs dal furlan al à ancjemò di afermâsi dal dut, aben che il **42% dal campion** lu segnali tra lis **lenghis uficiâls che a varessin di jentrâ intal contest amministratîf locâl**. Al è un ricognossiment indiret de percezion dal valôr de lenghe furlane, un altri element che al fâs capî che no son pregiudizis tal doprâle ancje in ambits "alts" e che tal stes timp al conferme il calâ progressîf dal stereotip che lis lenghis minoritariis a sedin adatis dome pal ambient familiâr.

Udin, ai 16 di Mai dal 2024

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

RISULTATI INCHIESTA SOCIOLINGUISTICA



PARLANTI




444.000
parlanti attivi

metà della popolazione
dei comuni friulanofoni




UTILIZZO DEL FRIULANO






QUANTO VORREBBE PRESENTE IL FRIULANO A SCUOLA






QUANTO SI SENTE FRIULANO








FRIULANO IN CITTÀ

PARLATO



COMPRENSIONE



TASSE



con una media di
22 euro pro capite



4 volte quanto
attualmente investito

AREE IN CUI SI PARLA LA LINGUA FRIULANA

